



# Аратал мира ясаң китас



Хор: ЯНАО губернатор пресс-служба

Там лапатан Ямал губернатор округ депутата па там муван улты хоятата ясаң китас, хоты верат муң мув суңеван мандат. Щалта па муй елды талата постаман ул. Хот, юш, уталтыты, леккар верат иса ванан тайлайт. Ванты, елды хатлатан, муң няврэмлува па хилдылува тата елды улты мосал.

Губернатор атэд ястас СВО хоща улты хоятат элды, муй хорпи нётосайт лув па лув семьяйлад вудат. Там хатл хутьяң нётоса постаман ул. Ляль манты вошат ураңан ищи ар верла. Овс мув шимлаң мир улапса ищи ант ёрэмала. Няврэмат уталтыты па велдци сэма питты отата нётосайт улдат.

## Ляль харан улты ёхлува нётман

Ямал куца ястас, хоты лув кашң пуш ляль харатан улты ёх пидан уйтантыйл. Щилта нётоса вохты щират иса туңматал. «Мет мосмаң – щит беспилотникат. Кат тал сыс щёрас молтас китман ус. Щитат ин муң мув суңеван верлайт. Ляль манты ха-

ран шеңк такан па яма рупитлат. Щи тумпийн па хорпи мосты пормас ищи китлув», – Дмитрий Артюхов ястас.

Елды тамащ нётоса ант хурдал, камн арат мосты питал – иса китла.

## Шопи мир хоятат ураңан

Касдыман яңхты мохилув улапса вошаң хоятат пидан артадаман шеңк даварт. Дмитрий Артюхов ястас, хонна ар мосал верты улапса кентатшак манты ураңан. Вуды тащан яңхты мохилува ялап нётосайт верты мослат. Худ велты ёхлув ищи ант ёрэмалайт.

«Катра тэдан, худ велпаслаты щир – мет даварт рупата. Кущаята партлам, хой щи вер сахат рупитал, луңан Ямал доватан худ велпаслаты хоятат хоща нопталты паната яңхты. Уйтантыты па потрэматы, муй верат туңматты мослат. Мосал туңа-щира поста- ты, артадаты, ясаң верты лув улапсаел кеншака верты ураңан», – округ куца ястас.

(Елды па ул)

## Туңа-щира иса ястас

Дмитрий Артюхов ясаң китмал порайн, лув лухаслад вуды тащ элды ёхтыдысат. Юрий Дмитриевич Вэненго пидан уйтантысам, каматса тал сайн округ куцаев луң порайн лув хотэда мойдаты яңхас.

«Ямас олда питлув, щиды лавал. Муй рупата верас, щитал лавалтас. Восатна мола спорт- комплексат, молайна ялап одат пунсамат. Ёсат, мала арат, каман километрайна версайт. Артан верамат.

Катра хотатна улды нэңхэт ялап хотата каслаптадайт. Ин ар- пелак тащан яңхты мохилув ищи хотан мадайт. Муң Бело- ярна хотан масаюв. Куртатан там йи- сан ищи кев хотат омаслайт. Молты нэ- пек лэщатты порайн тулт, па хоят хотан улды ант мосал», – Юрий Вэненго ястас.

## Мосты ясаң китман усат

Округ куцаев Дмитрий Артюхов ясаң китам элды Законодательной Собрание куца Сергей Ямкин ястас: «Кашң тал элды артадаман муң вантлэв, хоты сахат Ямал му- ван верат мандат. Муй верман уса па елды муй мосты верат ветлэм тада постасайт.

Ин муң депутатской кор- пусан елды партам верат иса посталдув, нэпека пондалдув па туңа-щира лэщатлалдув. Там мувеван улты хоятлув яма улты лаңхалайт, няврэмлад энмалты па елды уталтаты. Щи верат иса такан нумман тайлайт. Кашң пуш инща- сапсайт верлув, акатлув, хун хоятат пидан уйтантыдув.

Дмитрий Андреевич партам



Хор: Андрей Ткачев

верат иса талан тэдан вердалдув па паты унты тулдув. Щишан, ма нумастэман, аратал мир улапса ойңашак па щуняңашак йил».



Хор: Аллина Тоярова



## Аратал мира ясаң китас

### Хот омасты верат

Хот омасты вер кашң хоятан ванан тайла. Тунял 331 щёрас квадратной метра мийман уса. Тамхатл округ ловатан 253 хот омасла. Вет тал сайн Дмитрий Артюхов ястыйс нял пуш аршак хот омасты. Щи постама вер патэл унты туса. Ин вет тала па миллион квадратной метра омасты партас.

### Юш лэчатты вер элты

Хащам ятан арпелак мир даңхал туңа па яма верам юш хуват яңхты. Ин кашң вош па тухал куртат элты машинайн манты рахал. Щёрас молтас километра талман улда. Кашң пуш лув ялпитлайт, тухал тахаята ялпа талдайт.

### Кашң манты вер ант ёрэмиса

Дмитрий Артюхов щи тумпийн потар верас, хоты сахат муң Донбасс муван улты хоятата нётлув. Мосты хотат омаслув, аратал вер щирани нётлув.

Ямал онтасан Овс щарсэв хуват 80% пормас талдыла. Мув шув 8%, мув йиңк 5% молтас. 2024-мет талдан 6% аршак талдыты питса. Щи онтасан аршак рупата мосмитас, па хоятат охды ант омаслат.

Кашң вошан, куртан ар верла туңа-щира улты ураңан. Ялап ашкудайт, садикат омасдайт. Щи тумпийн энамты няврэмат яңхты харат ищи пуншлайт.

Тампуш 80-мет тал постадув, хоты Волаң Лялян нох питсув. Щишан талдаң тал архорпи верат постаман улдат. Щалта кашң хоята мосал щий пилтащты.

Ямал губернатор кашң тал тамащ ясаң верыдыйл, хой аршак уятты даңхал, верытал официальной сайтан вантты.

Аллина Тоярова лэчатсалды

# Нидмет пус манты ентапсэт



Хор: Вера Лонгортова

Ямал мувна IV Всероссийской Арктической ентапсэт ай кер тыдащ 25-мет хатл эвалт 31-мет хатл маса Пулцаватна па Лапатнакна мандат. Щи ентапсэт VI Международной арктической форум «Арктика – территория диалога» хоца лоңалсайт, лув ай кер тыдащ 26-мет па 27-мет хатлданна Мурманск васна манта питл.

Ентапсэтна касты ораңна энамты яхат па ныңат 11-мет тал эвалт 19-мет тал маса Карелия, Коми, Саха (Якутия) республикайт, Красноярской край, Архангельской, Мурманской областят, Ёмвош, Чукотской па Ямал мув эвалт яха актащлат.

Ловатдна ертъяң касты хар питл: баскетбольной двоеборье, нымальна нёхамман поскан эвалт юватлита, ланщ элты ентты волейбол, нымална касдат, савлантлат, северной многоборье, фигурной катание па хоккей.

«Муң округу нидмет пус тамащ ентапсэт верта питл. Там проект онтасна энамты касты няврэмат анта топ лув ёрдал эттада веритлат па медаль сытта, тамащ уйтантопсайтна ар пелак энамты нэңху лохсаңци йидат», – Ямал мув физической культура департамент коща Александр Кусенко лавас.

Мет алаң ентапсэт 2022-мет тална версайт, щи порайна 141 нэңху кутладна кассат. 2024-мет тална мули 500 энамты нэңху каста ёхтыдыйс.

Вера Лонгортова хансам потар

## Энамты нэңхэт тумтак олапсы

Ямал мув энамты нэңхэт, хой йилап хаттэл верас, няврэм тайтэл алаңна мосдал ванттэл ораңна серификатна мадайт. Кат тал сыс 608 нэңху леккар хатна яңхас. Леккар нэпекаат вантман ки, касң холмет овс мув нэңху мос тайл. 114 нэңху диспансерной учётна лайл, 92 лечитса, 31 энамты хаттэл няврэм лаялдат.

Щи сертификат хуват энамты ныңат мет алаңна ның леккарна па терапевтна вантыдайт, яхат – ях леккарна. Китамтак вур малдан па УЗИ верлаңан.

«Там сэңк масты инициатива. Хаттэл верты порайна, энамты нэңхэт тумтак олапсыдал пушци ант оцлат, щит мет

волаң вер, няврэм тайты тахайна. Энамты хаттэл сертификат онтасна энамты нэңхэт леккар хатна яңхлат, мосдал вантыдайт», – окружной леккар хат Центр терапевт-леккар Ирина Кныш лавас.

Там йисна сэңк ар энамты нэңху няврэм тайта ант веритл. Щитна 2023-мет тална Ямал хуват актама даныйт федеральной экспертат элты вантыта китсайт. Щи онтасна Хон мув Минздрав 2024-мет тална йилап направление пунсас, энамты нэңхэт тум-

так олапсы вантыта. Щи обследование энамты яхат па ныңат ораңна 18-мет тал эвалт 49-мет тал маса партман ол.

Вера Лонгортова хансам потар



Хор: ЯНАО леккар хат департамент

## Мув вантман яңхты нэңхэт уйтантылат

Ямал мув туроператорат Москва васна манты 31-мет МПТ туризм па майң нэңхэт уйтты Международной выставка хоца муң региону этталат. Щимащ емаң хатл онтасна мет ар майң нэңху муң округуна хушта рахал, йилап лохсат моцатта. Хой мосаң тата хащта вурабал.

Мет вул туризм эттады харна Хон мув па па мув турбизнес эттады представителат ёхатсат. Ямал мув стенд хоца «Сделано на Ямале» «Discover Yamal» («Дискавер Ямал») компания, «Ямальская авантюра» па «Север экстрим» лув мет ям туристической вердал эттасат.

Там вантапса муң орцевна – сэңк ямас хайл, мув вантман яңхты нэңхэт Ямал мув пушци мет ямас оцта питлат. Мет вул онтас шимлаң мир тул, нэңхэт щират-пищат вантты ораңна яңхлат», – Ямал мув экономика департамент коща Валерий Миронов лавас.

Тампус щита Хон мув 54 регион эвалт представитель ёхтас па 36 па мув, щита СНГ, Ближний Восток, Индия, Непал, Китай, Венгрия, Куба, Кения, Мадагаскар па па атат.

Вера Лонгортова хансам потар



# Охаль ёх рут общинайн рупитты ху

Хащам ятан Андрей Николаевич Мироненко пидан «Югра лэтотат-пормасат» тынасты-лутасты вантопса хар верыдыман уйтантысам. Щи порайн шеңк ар хоят щий ёхтыдыс. Арпелак хатнэху дый рупатайдад онтасн туса па яма ёшатн верам пормасдал, думатты сохдал па эплаңа лэщатам лэтотдал ед аратэдн тынысат. Климет хоятат щи отат, япсыена вантман па артадаман, щитат иса холдыена лутсат.

Щимащ лэтотаң-пормасаң вантопсайн удман, и руц ики пидн потрэмасам.

– Тата оша версэм, хоты наң Ёмвоша Лэв ёхан курт Суматвош район элды тый ёхатсан, муй верытдан муңева ястатя па муй хораспи лэтотат тусан?

– Ма опращ нэме Андрей Николаевич Мироненко, «Рахтынья» нэм тайты рут община хоща Лэв ёхан куртан Суматвош районан 15-кем тал арат улдам па сыр-сыр рупатайт щита лэщатдам. Муң рут общинаев кушя ям хув вуш элды Александр Игоревич Голошубин уд. Ма па щитахая арсыр лэтотат муй мосты пормасат лутдам. Щалта муң хоятлуд ар худ па вой моцаттэд порайн Лэв ёхан куртэвн щимащ хот тайлуд, хота сыр-сыр консервайн ям ар верлуд. Юхат щита лэтотат кашң талн ма арсыр ун вошатн улды хоятата нэман тутам па лувилала тыныдам. Ёхды манты кемн общинаев хоща рупитты ёхлама мосты лэтотат, пормасат лутдам па Лэв ёхан куртэма щита отат ищи машинайн тутам.

– Андрей Николаевич, муйсыр худатн округ кушяятн квота щирн эсалдайт?

– Щита вер элды туңа-щира ястатя ант верытдам. Ванты, квота нэпекат патан ант тайдам. Туп муйсыр худат муңева там ёхи хащам талат сус ёша пайттыя рахл, щита вер элды потартыя верытдам. Государстваев элды муңева юкантам квотайт щирн там йисн общинаев нялак худ велпаслатыя верытл, руц щирн лув тугун муй сосвинской сельдь нэман маса. Щимащ нялак худ муңева там кутн шеңк ар ищипа велтыя ант рахл. Ванты, лув еша улды ёханлувн иса щита антома йил. Ёхи хащам талатн паннэ, сорт, мевты, келци па цапар худат ям



«Рахтынья» (охаль ясаң щирн, «Воцлахаң ёхан») рут община верам лэтотат.

Хор: Владимир Енов

арат ар моцатылуд. Щалта квота щирн сарах худ па муң община ёхлува еша велпаслатыя рахл. Вунш па щёхар худдан там йисн закон щирн ёша пайттыя ищиты ант эсалдаюв. Товийн муй сусн, хун арсыр худат дытоп хольты тахая манлат, муң общинаев хоща рупитты хоятат ищиты ант па велпаслатат.

– Андрей Николаевич, муйсыр лэтотат нын «Рахтынья» тахайн элды Ёмвошн верам тынасты-лутасты харата тусты, хоятатн дый лутлайт муй анта?

– Ма щирэмн, «Рахтынья» рут общинайн верты лэтотат хоятатн яма уйтлайт па кашң пуш яма лутлайт. Ёмвоша муң иса ёхтыдылуд. Тал юш хуват мет олаңан Лэв ёхан куртэв элды Игрим вош унты айдтыена йисув. Щалта Игрим элды донщопан елды пела мантсув.

Тый ям араткем пресерва хошапат тусув, щит: «Нялак худат», «Сарах худат», «Сорт худ дьтпат»,

А.Н. Мироненко.

худ па кураң вой муй вуды нёхи элды верам пельменят па арсыр эплаң лэтотат. Тата вошаң хоятатн дый шеңк яма па ищи курумн арпелак элды лутлайт. Ма нума-стэмн, тынасты-лутасты харат шеңк муңева мослат. Щита онтасн, ванта, муң кушкепа ай куртатн улдув па рупата тайлуд!

Владимир Енов ханшам потар

## Вуды тащат арамтаты ураңан

Кашң тови вой леккарат вуды тащат хуват яңхлат па вакцинация верлат. Лорвош районан там хатлатан «Мужевское» па «Горковское» тащатан сибирской язва элды портун понлат. Щита тумпийн ампат ищи яммалдайт.

Тунял худамхоцъяң щёрас вуды портунан понмас уса. Худам щёрас вуды посан понтса. Тамиты тащат вантман тайты ураңан, вулэт мушан ант ёхатлайт. Щита веран ханты мир улапса ант хурдал, па елды йис щираман манты питал.

## Ашкуда етшаптаты хатлат ястасайт

Мосванан ашкуда етшаты няврэмат верты емаң хатлат ястасайт. Луңханщап щулиты сый Ас нопатты тыдащ 24-мет хатадан верда, якаң-араң хатлэл, хун уталтыты нэңдал па ёхдал, аңкидал па ацидал пидан холд уйтантылат – уц тыдащ 28-мет хатл.

2025-мет тал вуш элды «Молодёжь и дети» проект верса. Щита онтасан няврэм лув ямал арталаты верытла. Кашң няврэм туңа-щира экзаменад ат мал па лувела сама рахты юш ат пирийл, па елды яма ат уталтыйл!

Алина Тоярова ханшам потарңан

### ОГЪЯВЛЕНИЕ

СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ 8(902)81-6-11-90 ЗВОНОК ПО РОССИИ БЕСПЛАТНО

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА 6 200 000 Р ЕДИНОВРЕМЕННАЯ ВЫПЛАТА 3 500 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживания в г. Салехарде бесплатно, 3-х разовое бесплатное питание!

#### ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 100 000 Р ЕДИНОВРЕМЕННО ОТ РЕГИОНА ДО 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ ОТ 210 Т.Р

СЕРЖАНТ ОТ 232 Т.Р

ПРАПОРЩИК ОТ 292 Т.Р





# Хорамаң па вешккат ханты



Хор: Альбина Тыршина

Округ вошат па куртат хуват вулы ёх емаң хатлат мандат. Ханты хоятат артан туп Дорвош районан уйтантылат. Хасям лапатан Ханты-Мужийн яртъяң вулы тащ элты ветъяң хоттэл па вулы тащан яңхам хоятат яха актасисат. Кимет талд симась ун уйтантопса верса.

Кат хатл сус касапсайт, уйтантопсайт, вантопсайт мантсат, тынасты харат дарпитсайт. Мойң хоятат вулы хотата доңтысат, ханты дэтот лавемисат. Камн па лэты тахайт рупитсат: шарытам хул, шаркоп, плов лавемиты рахас, щанька шай пидан йинсематы.

## «Аргиш Ямала» вулы ухлат эталтысайт

Кирам вулы ухал вантопсайн 25 хоттэл касас. «Аргиш Ямала» вулы ухалан СВО хося Афанасий Тимофеевич Лонгортов шушас. Си вантопсая мет хорам, юраң вулыдал кирлайт, вулы ухалдал хорамаңа лэсятлайт, ольпаң паркедан ярлайт. Мет хорамаңа лэсытам ухал пирыйм хоятал мойлаптаса.



## Касты харат маныдысат

Ханты-Мужийн Дорвош район вулы тащан яңхты па энамты хоятат туп кассат. Хоятлуд

шан дохан хатэмиты харан мантсат. Няврэмат вулы ухал шоппи наваргсат, юх талсат па хулам пуш навармисат. Дохан хухатдыты энамты па ун хоятат Артём Пугурчин вулы тащан яңхам хоятэда, касапсаел постасэл. Артём 2023-мет талан ун кер тыдасын СВО хося антома йис.



ясаң элты, там пуш яма верса, няврэмат, энамты ёх, ун хоятат атэл кассат. Кашң лув категорияйн касас па мойлапсайт шитас. Олаң хатадан олаң пуш энамты ёх троеборье верса. Касапсайт Мужи во-

Кимет хатл алаңсахат элты, щикунш атом турам ус, касты хоятат Ханты-Мужийн тынсың сува ёвалмисат, вулэң ухадан навралтысат, нэңат дохан хатэмисат, этнобиатлон сирн касасат па катлантыман юрасьсат. Там тал олаң пуш мастер-класс эталтыса, хоты вулы ухал кирты мосал. Вулы тащан хув рупитты хоят Олег Пырысев аляс.

## Дорвош район куся пидан уйтантысат

Олаң хатадан алаңсахат элты, вулы тащан касдыман яңхты хоятат Дорвош куся ху пидан уйтантысат. Ходна Горка па Мужи вош совхоз кусяйңан усңан. Ялап талан муй арат вулы нёхи хорса, хоты рупатаел елды туты, потар тусат. Муй хорпи нёттапсайн нётты верытлайт, ястасайт.

Си уйтантопсайн ходна Мужевской совхоза вулэт яммалтыты ялап леккар пирьса. Кашң бригада пидан ин Алексей Николаевич Озелов рупитты питад. Касапсайт манты порайн, кат совхоз кутан аршак нох питам хоят луңатса па квадрокоптеран мойдаса. Мужевской совхоз нох питас па си мосты пормас шитас.

Ас нопатты тыдасы элты тыдасы сус спутниковой связь хуват, муй хорпи турам питад, кусяйт потар тулат. Каматса тада лув совхозлада па тахайт элты вулы тащан яңхты хоятат рупитты вохты. Си порайн муң вулы тащлуд, суювлуд шавиллуд па тащлуд уншака верладлуд. Симась ясаң Олег Попов тус.



Хор: Вера Лонгортова





# ёх емаң хатл

## Нётапса верат

Кат хатл сьс юридической сирн тайты инсяпсайт хуват Ладатнаңк вош элты ёхтыдыйм нэ Инна Леонидовна Ванюшина рупатайл тус. Си хатлатан ханты хоятлүв ёхтыдысат па инсяпсайдал дэрапсат. Хоты мосты нэпек туңа-сира лэсятты, интернатан улты няврэмат па курта ант китты ураңан, хоя па хоты нэпекат ханшты. Мойлапсайт шитты хоятат, 13 % вуты налог хоты сохаптаты, хот элты инсяпсайт усат.



Хор: Вера Лонгортова

## Тусаңа ханшийн ёнтам сохат

Емаң хатлатан шоши мир хоятат тайты сохдал эталтылат. Ханты хоятлүв няврэм, нэ, ёх хоят мет хорам сохат тайлат. Мет тусаңа ханшийн ёнтам сахат, вайт, молсяңат думатлат, хорам охшамат понаплат па картэң сэв сэвдат. Кашң думатты сох тус ёшан ёнтман ул, вантты умась, па шоши мир хоятат кутан мет хорам сохат.

Си емаң хатадан «Тус ёшаң нэңат» касаспа манас. Кашң нэ вуды хотал аляс, тайты пормасат, думатты сохат па ханты лэсятм дэтотат эталтасат. Хоты касдыты пит-

сат, потар тусат. Си касаспайн Наталья Романовна Озелова нох питас па мойлапса ох шитас.



## Ялап касаспайт версайт

Олаң пуш па мет волаң «Няр нёхи» касаспа ус. Пулңават вош па куртаң нялхосьяң хоят касас. Вуды нёхи элты эплаң, всяя нёхрам нёхи па хорамаңа хуваната понам дэтотлаң эталтысат. Кашң си вантопсая ёхтыдыйм хоят симась дэтот лавематы утсийс. Си касаспайн Емельян Кириллович Куртямов Овкурт элты нох питас.

Ходна си хатадан Волгоград воша сьтсясса шитты рахас. Кашң ёхтыдыйм хоят лотерея билетан мийдыса. Си билет хуват холна

охды вуды па доваң ухаңан навралтыты рахас па вуды хотан хул па нёхи элты кавартам дэтот лэты па шай йинсьты. Ойң билет Денис Палкин ким талас. Лув похал ин СВО хося ул.



## Нох питам хоятат

Манты касаспаятан мет ар, вет сорнең мевал пос Эдуард Лонгортов шитас. Ходна си хатадан сэма питам хатлаң ус. Муң па лувел мойлапса ясаңан ясталэв.

Вуды ухаңан наврылтыйм па катлантыман юрасьты хоятат «Тайга» донсьхоп шитсат. Шеңк умась вантты, хоты хорам, каркам ханты няврэмат, нэңат па ёх хоятат юрлаң альдаң.

Там пуш нох питам хоятат кутан:

- хулам пуш навармиты харан Эдуард Лонгортов олаң места ус;

- вуды ухаң шоппи наварты сирн па Эдуард Лонгортов олаң тахая этас;

- нялъяң тал доват унты дохан хухатдыты хоятат элты Светлана Лонгортова па Эдуард Лонгортов нох питсаңан;

- нялъяң молтас тал элты Олеся Пугурчина па Станислав Лонгортов дохан хатэмиман нох питам хоятңан;

- мет каркам нялъяң тал унты юх талты хоятат кутан Дмитрий Валеј;

- этнобиатлон касаспайн МСП «Мужевское» нялмет бригада олаң местая этас. Сит – Станислав па Эдуард Лонгортовңан, Максим па Константин Талигинңан;

- тынсьяң сува ёвалмиты ёх

кутан па Эдуард Лонгортов нох питас.

- хоттэл эстафета хося мет каркама Артём па Ольга Куртямовңан усңан;

- шоши мир ёх верат туты округ департамент элты хоттэл эстафетайн касты ураңан Олег па Марина Максаровңан мойлапса шитсаңан;

- катлантыман юрасьты хоятат хося МСП «Мужевское» олаң бригада элты Пётр Артеев олаң тахая этас.

- вулэң ухаңан навралтыман Эдуард Лонгортов па Олеся Пугурчина мет каркамңан усңан.



## Мет туспак вулэң ёх мойлаптаса

Олаң хатадан вуды тащан яңхты ёх хоятат па вуды хотан рупитты нэңат мойлаптасайт, кашн эталтысайт. Кимет хатадан касаспаятан нох питам хоятат нэпекатан юкантсайт, мойлапсаятан па охан мойлаптасайт.

Кат хатл сора манамтас. Емаң хатла ёхтыдыйм мойң хоятат аматман ёхды мантсат. Вуды

тащан яңхты хоятлүв ин папуш симась ун емаң хатадан туп яха уйтантылат.

Кашң хоятэв тумтака ат ул, елды педа касаспаятан нох ат питал, вуды тащдал уншака ат йилат, улапсаед туңа ат манал.

Альбина Тырлина  
ханшам потар



# Йис пормасат шавиты хот кушчая ус

Варьёган куртан Нижневартовской районан удмеман, мет олаңан Ю.К. Вэлла нэмпи йис пормасат шавиты хот кушчая нэңев Агафья Дмитриевна Казамкина (Айпина) пилн уйтантамыс па потрэмисам. Ёхи хащам порайн лув пенсияйн ул па «Ветеран труда Ханты-Мансийского автономного округа – Югры» муй «Почётной гражданин Нижневартовского района» нэмңанан яма рупитмал ураңан кушчатн юконтса.

нови туром идпийн ус. Лув ши йисн хускем лув юканал вулэт тайс. Шеңк яма па туса верантты хоята ус. Шиңанца худ велты арсыр пунат сэвас, вулэң ухлат верас па арсыр унт куртанн лувела мосты пормасат муйт иса ши яма лэщатас.

Вудылад лавадты верат тумпийн, ащикев шуңат ар худ велпаслас па унтата вой велтыя иши яңхас. Тухал порайн лув муңев худ велпаслаты тувидысды.

ханты ясаңн потартлув. Шиңанца Варьёган куртан ма туп нядмет классэм унты уталтасайм. Щалта Новооганск вош ашкудая ши китсаюв. Щита, ванта, нийл тал вуш унты ашкуда-интернат велдишак омасса.

Новооганск вошн уншак классатн елды уталтасаяюв. К а н и к у л ы ёхатты порайн ищиты ащикев шуңат муң юевн вулэң ухалн ёхтылдыс. Мет олаңан па лув муңев Варьёган курт вуш унты аңкев па апщев хошча тусды. Юхат иши унтан улты рут куртада муңев тутлидысды, хота муң верыттыя кемн лувел иса арсыр вератн нётсув.

– Хун па Новооганск вошн улты нийлталпи ашкуда-интернатн уталтаты щир ет-



А.Д. Казамкина.



Хор: Владимир Енов

Муй щирн лув ус па улапсайл хуватн туса рупитас, ши вердал ошаңа-щаңаңа версам па айлтыена айкед инщасам.

– Агафья Дмитриевна, хота наң сэма питсан, энапсан, ашкудайн уталтысан?

– Ма Варьёган куртан Сорханл районан сэма питсам. Ай порайн муң хоттэл хоятлуд пилн Сыңк васы дорн унт куртэвн усув. Тамхатл ши куртыев Тутн ёсам тахая айлда, хота муң Варьёган куртаң нэңлуд иса арсыр вонщамотат акатман кашң сусн яңхлат. Муң щемьяевн мет олаңан кат няврэм энмас: ун яйм па ма. Хун ма вет тал довата йисам, кимет ху апщем сэма питас. Шиңанца иши порайн ащев сорма питас. Аңкев ши верат манам юпийн муң пилэвн Варьёган куртэва каслас па интернат хотн лувела рупата мощатас. Ши порайн 1960-мет талат мантсат. Хун па мин яйсакңан ашкудая уталтатыя мантсаман, щутщаты пораятн иса кашң пуш ащикемн лув улты унт куртада вулэйн тутлисайман.

Ащикев шуңат ям хув там



Ши хатлатн муң лувел сойпидытыя нётсув. Ар худ мощатысув, щит: сортат, мевтэт, ханшаң худат муй келщет. Юхат ащикев ши худат Варьёганан улам колхоза холыена планат тэктоптатыя щирн масды.

– Агафья Дмитриевна, руш ясаңан наң хошсан, анта, ашкудая манмемн?

– Ма ши ясаң иса ант па уйтсэм. Юхатшак нулевой класс хошча уталтасаяюв. Ёдан па мин кутэвн ханты ясаңан потрэмасув. Мосаң, тамхатл ши ураңан шеңк туса па хорамаңа

шаптасан, муй щирн елды улапсаен лэщатсан?

– Щалта Новооганск вошн ашкуда етшаптамом верат юпийн ма мохты С.М. Киров нэмпи колхоза Варьёган куртэмн рупиттыя питсам. Щимащ таха катра муң хошчаев ус. Лув хошчаел доват, пусты мисат, ай мисат, лэпкат па охсарат энмалты хот ищиты тайса. Ши тумпийн, талаң худам колхозаң вулэ тащ па ус. Ши ураңан ханты ёхлуд вулэ лавадман ши тахайн холыена япсыена рупитсат.

Ин ма япсыена нумлэм, хоты

кашң талн тови пелка ёхатты кемн муң Варьёган куртэвн вулэ тащат луңатсайт па нох хорты вулэт атэлт улты ун пушаса акатсайт. Шиңанца шошия улты куртаң хоятат иса аратэлн ияха вулэ нох хортыя ши яңхлат. Юхат вулэ нэхет муйт Сорханл вошеда тудайт па арсыр тахаята ед тыныты щира китлайт. Варьёганан катра ун еңкаң хот верман тайса, мата тахая колхозн рупитты хоятат арсыр худат планат щирэлн государствая масат. Ши худат Сорханл воша тутаңхопн тусайт, хота па сыр-сыр консерва хошпат рыбзавод хошча улты хоятат версат. Катра Варьёганан унт юхат эватты тахайт лэщатман усат, ши отат хошча муң хоятлуд рупитсат.

Щалта куртэв хошча сохлат эватты хот па тайсув. Нэмолты хатнэху колхозат улам пораятн рупатайды ант па опсас. Ма ши колхоз хошча лэпкат муй питы охсарат энмалман ямкем арат тал усам па рупитсам.

Имолтыйн 1978-мет талн колхоз кушчая ёхдамн ма Дарья Даниловна Айваседа пилн Ёмвоша худам тылащ сус сувенират верты щирн уталтаты китсайм. Ши вер юпийн муң ёхи ёхатсаман па Варьёган куртэмн ияха сувенирной тахи версаман. Ёхи хащам талатн муң хошчаева 17-кем нэ ус па арсыр рупатайт япсыена лэщатас.

(Елды па ул)

Владимир Енов  
ханшам потар



# Хоты Ицкең Аки Тови юкана хащты вутщийс

(Олаң шупад № 11 луңталн)

Ицкең Аки Шоврыед каншты манас, уятсалды па лувел инчасалды:

– Шоврые! Наң па муй аматан ёхатсайн?

– Товия! Аки, наңен муй ант ныда, тови ёхтас! Хатдат хошма йисат, ялап ванши торныет энамты питсат, щипкет арылат.

Наң муй ант вантсэн, хоты ма талн юх кар порсам. Хоп юхиет воцрэм кардал холыена лэслам. Велци энамты ванши торныет малы щикем эплаңат, саккараңат.

Ицкең Аки Питы Лук икел каншты манас. Уятсалды лувел па инчасалды:

– Наң па муй аматлан?

– Ма ищи хошам хатдата аматсам. Тал сыс марэмасайм. Кушкепа еша сэңкатсам, юрэм альсэм. Чуф-ши! Чу-ерши! Сэм холямдам вуртэт, тохаднадам питэт.

хорам лыптата шеңк аматсам...

– Кой, кой! Ицкең Аки няхан ёхатса! Наң муй ай нэ, хорам лыптата аматты. Лыптат элты оха понты хорам сэвлан? Шеңк мосал ки талаң хиран акатлэм. Лаңхалайн? Лыпатдам йи доватат, йи кулатат, холыена новет.

Щалта лытовдалан раньналты питас па сэм нох ант элдал. Лытовдал элты донц сэмиет рыйты питсат, пудылат, дарылат, щиты вотаса ювемас.

Мойпар Ицкең Аки педа ястал:

– Анта, Ицкең Аки! Наң лыпатдан дыл ант тайлат, нэмолтыйн ант авдат, ёш патын холты доладаг. Тови нэңие кашң лыптад хорасаң – муйкем ай, эсаттыйн торн

патан Луң апщел тул, хошам хатдат, восты торнат. Кашң ай торнаң лыпты саккараң мав акатал, луңан вонцапсайт энамдат.

Мойпар па па щи елэман ёхатса. Веншал ёшан лап пентсалды па шитама потарты питас.

– Ицкең Аки, наң малы вер ант уятлан. Муң мойпарат, саккараң эплаң лэгот шеңк яма лэду! Талаң луң вонцадлув. Талан хотэман одам, хот доңлэман донц па еңк, ма па удмидам, хоты луң мув хуват

шушидылам па эплаң вонцапсайт лэдам.


– Па щиты ки, муй ма ястадам, – Уртэм Ики, наң лыптат эсатман саккараң вонцапса каншдан ки хоты нэрыты. Ма идампа нынан ин щах ант мосдам. Хоты верты, щиты ки мандам ма Кев тум пелка, Овс муват педа, хота донц ант доңдыл па хошам най ант этдыл.

Щиталан Ицкең Аки шашн кердас па ел шушмас.

Зоя Куртямова толмацсалды



Хор: А.Тайберг



Хор: Т.Вакуленко

Нёдад нох шаншман арад ел сухтасды, нэмолды ант ныда, нэмолды ант щащал.

Щиталан Ицкең Аки Мойпар икел каншты шушмас. Иныкел ваншең унт хар лотан дарпитымад па хошам най идпийн хошмалтыман одал.

– Уртэм Ики, яста манэм, Тови пидан муй аматан ёхатсайн?

– Мойпар холты елэмас, ёшадан веншал лап каталсалды па шитаман ястас:

– Хорам лыптата, Аки, ма

ваншийн авал, дыпен хоца щикем ям. Наң ёхаттэнан потам рув па донц патан тулан па щи. Шоврые ванта, талаң йи тахайн дойты ант верытал, курдал-ёшлал потлайт. Щит ураңан щи навратдыман ешащал.

Щалта унтаң мохет йи турсыйн ел нюхмасат:

– Тови ёхатталан,



Хор: Ф.Василенко



# Интернатан улты ныврэмат улапса



Хасям лапатаан Васъёханов ашкудайн уталтыты ныврэмат пидан уйтантысам, ханты ясаң урока яңхсам па интернатан улты ныврэмат пидан потрэмисам.

Рут ясна ныврэмат уталтыты ху Алексей Эдуардович Конев ашкудайл па пормасат шавиты хотал альсалды. Ханты ясаң, похат па эвет вератты, физкультура урокатан усам. Интернатан ханты ныврэмат улапса вантсам, похат, эвет па рупитты хоятат пидан потартсам.

Сютсыты хатлатан Ханты-Мужи куртан вуды ёх емаң хатл манас. Аңкидал-асидал ёхтыдысат, ныврэмат емаң хатла тутдысат. Эвет па похат сита хорам тайты сохлад эталтысат, касапсайн кассат. Алексей Эдуардович рупатайл элты потар

тус: «Ныврэмата рут ясең лаңхаман уталтыты ураңан, рупатаев яха верлэв. Ныврэмат ханты ясең хулдат, тащ хотан яңхты ныврэмат рут ясеңдан потартлат. Кашң ныврэм урокан антом туп ат уталтыйс, улапсайл умца ат маныйыс. Сишан ныврэмат пидан архорпи проектат, вантопсайт, нёхты хорат па па рупата лэсытлүв».

Там лопасан Васъёханов ашкуда-интернатан улты ныврэмат улапса альлүв. Елды этты газетаятан потрэв елды тулэв.

Альбина Тырлина  
ханшам потар



Хор: Альбина Тырлина

## Газета «ЛУХ АВТ»

Адрес редакции:  
629003, ЯНАО,  
г.Салехард,  
мкр. Богдана Кнуянца,  
д.1, каб.106  
(34922) 4-68-63

E-mail:  
luh.avt@yamal-media.ru

## Учредитель

Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д.9, каб.708)

## Газета зарегистрирована

Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

## Тираж 1300 Заказ 0241

Подписные индексы:  
на год – ПА700, на полугодие – ПР561

## № 12 (1263)

Газета вышла в свет 22 марта 2025г.  
Подписано в печать 20 марта 2025г.

по графику: 16.00

фактически: 16.00

Газета выходит по субботам

Цена годовой подписки 88 руб.,  
в розницу не распространяется

## Издатель

Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д.9, каб.708)

Отпечатано в АНО «Ямал-Медиа»  
Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кнуянца, д.1, каб.106

Фактический адрес: 629007, Ямало-  
Ненецкий автономный округ, г. Салехард,  
ул. Чубынина, д.39А

## Генеральный

директор  
АНО «Ямал-Медиа»  
Зулинова  
Марья Андреевна

Главный редактор  
Яковлева  
Аллина Кирилловна